

衡

華

館

詩

錄

序

詩緣情而作也夫人必有不能已之情然後有可以傳之詩而世乃分唐別宋尊杜慕韓斤斤然矜體派標品格自以爲工舛矣抑亦隘矣紫詮先生富於學卓於識逸於才著作等身不以詩名而觸事感情筆箋揮毫百篇立就或莊或俳忽正忽奇時而陵紙怪發時而絃外音流脫盡町畦自成杼柚先生之言曰予不知其爲詩也祇自寫其情之不容已焉耳嗚呼此所爲不必以詩名而詩卒不可及且可歷久彌傳也去歲遠游東瀛與其國之文人學士交酬唱甚多懼日久稿或散失遂取生平諸作彙成一集付諸手民凡友人贈和者亦並附焉蓋以見文字之交一往情深而纏綿之致歎治之誠流露於不自知卽千百載後展卷低徊昭然若揭也且夫

惟有餘於情之外者乃有味乎詩之中古之人矢口謳歌豈預計流傳於後世而以情感情遂不得不推爲絕調則知詩無工拙以有真性靈真情韻爲工拙或謂先生遺謠晦迹抑鬱無聊以詩自遣方今朝廷求賢若渴將有人焉力爲推轂俾得奮於天衢施於當世元微之曰雕蟲小技壯夫不爲此集之成非先生性所安也噫果若所云則情滯於境而移於物矣以是言情其情必僞以是爲詩其詩可知偉少爲飢所驅稟承庭訓不敢耽於韻語以悞有用之光陰此中甘苦旨趣恐屬茫然顧見世之以門戶判詩以典籍填詩甚或以剽竊險隘敷衍其詩心竊愧之光緒紀元之歲獲交於先生是以道義相切劘數年如一日故知之獨詳因泐數言俾讀先生詩者知其梗概焉庚辰端午愚弟番禺洪士偉拜序

自序

余不能詩而詩亦不盡與古合正惟不與古合而我之性情乃足以自見余足不出里巷目不覩邱墳所與交接者又絕少當世通人名士方弇鄙自愧何敢言詩不惟不敢更何足以知詩然竊見今之所爲詩人矣攘擣以爲富刻畫以爲工宗唐祧宋以爲高摹杜範韓以爲能而於己之性情無有也是則雖多奚爲慨自雅頌降爲古風古風淪爲律體時代旣殊人才亦變自漢魏六朝迄乎唐宋元明以詩名者殆不下數千家後之學者難乎繼矣詩至今日殆可不作然自有所爲我之詩者足以寫懷抱言閱歷平生鬚眉顯顯如在此風雲月露草木山川而有一己之神明入乎其中則自異矣原不必別創一格號稱初祖然後翹然殊於衆也余自少讀

詩自古作者以逮 本朝諸大家皆欲討流派源窮其旨趣
久之益知作詩之難及長雖有所作未敢持以問世惟顧滌
盦明經師楊醒適茂才稍稍見之以爲可存竊嘗謂所貴乎
詩者與苟同甯立異必自淺之深由麤而精歷觀古人作亦
有不盡佳要其研精殫力積數年十年而後成自有一家面
目在夫豈徒以繙章節句爲事哉性情之用真而學問亦寓
乎其中然後始可與言詩矣余今年二十有二歲積詩凡數
百首要不盡可存但願質諸天下後世之能詩者以共相印
證可也道光二十九年己酉夏四月下旬蘅華館主識於甫
里行素園之南窓

弢園老民自傳

老民姓王氏，素居蘇州城外長洲之甫里村。卽唐陸天隨所隱處也。老民以道光八年十月四日生。初名利賓，十八歲以第一入縣學督學使者爲察中。張筱坡侍郎稱老民文有奇氣，旋易名瀨，字懶。今遭難後避粵，乃更名韜，字仲弢，一字子潛，自號天南遜叟。五十後又曰弢園老民。老民世系本出崑山王氏，有明時巨族也。族中多有位於朝。明末兵事起，吾家閩門殉國。始祖必憲甫在垂髫，逸出存一線。自此至晉侯詒孫載麟，居崑凡四世。竝讀書習儒業，有聲庠序間。載麟諱鵬翀，品端學博，尤爲士林所推重。以早世，子尙幼，戚串中有覩覩者，乃遷甫里。大父諱科，進字敬齋，習端木術，篤厚慎默，見義勇赴。鄉里稱善人。父諱昌桂，字肯堂，一字雲亭，著籍學

官廳於經學九歲盡十三經背誦如流有神童之譽家貧刻苦自勵教授生徒足跡不入城市老民上有三兄十日閭俱以痘瘡禱於武林遂生老民老民幼時屢夢浮屠佛像魂自能從泥丸宮出入十餘歲後始止自少性情曠逸不樂仕進尤不喜帖括雖勉爲之亦豪放不中繩墨既孤家益落以衣食計不得已橐筆滬上時西人久通市我國文士漸與往還老民欲窺其象緯興圖諸學遂往適館授書焉顧荏苒至一十有三年則非其志也滬上雖爲全吳盡境而當南北要衝四方冠蓋往來無虛日名流碩彦接跡來遊老民俱與之修士相見禮投縞贈綺無不以國士目之中如姚梅伯張噓山周弢甫龔孝拱其交尤密西館中時則有海甯李壬叔寶山蔣劍人江甯管小異華亭郭友松並負才名皆與老民爲莫

逆交惟是時事日艱寇氛益迫老民蒿目傷心無可下手每酒酣耳熱抵掌雄談往往聲震四壁或慷慨激昂泣數行下不知者笑爲狂生弗顧也金陵旣陷爲賊窟而漏上亦以閩粵會匪起戕官據城老民思出奇計以復之卒不能發憤抑鬱患咯血疾幾殆咸豐八年徐君青中丞開府吳中與老民固有文字之契老民以和戎防海弭盜三大端進言前後上書十數通皆蒙優答十年金陵大營潰賊竄吾吳常鎮蘇太同時俱陷東南半壁至此糜爛四郡村鄉亦蹂躪無完土老民於是志愈孤心彌苦方捧上官檄督辦諸鄉團練老民知其貪詐畏怯萬不可恃屢上書當事代畫方略言過切直當事外優異而內忌嫉之顧所言頗見施行多能見効其最要者以西人爲領隊官教授火器名曰洋鎗隊後行之益廣卒

以此收復江南然用其言而仍棄其人并欲從而中傷之此老民之所以扼腕太息痛哭流涕長往而不顧者也維時賊於蘇鄉遍設僞官立董事皆土著人暴斂橫征僞卡林立老民固素識諸董事密相結納說以反正言曾帥善用兵祇以方剿上游未遑兼顧今安慶已復援軍旦夕必至不可不自爲計因激以忠義勉以功名令諸董事入賊中說頭目結內應皆有成說其黠者亦從而徘徊觀望老民密縱反間使賊黨互相猜貳自煎羽翼諸內應者多急欲見功勢頗可乘而當事者遽以通賊疑老民禍且不測聞者氣沮老民急還滬上猶思面爲折辨顧久之事卒不解不得已航海至粵旅居香海自此歛門削跡壹意治經著有毛詩集釋專主毛氏後見陳碩甫毛氏傳胡墨莊毛詩後箋遂廢不作同治二三年

間李宮保方次第克復吳中郡縣老民代粵人某上書宮保
陳善後事宜并言諫遠情師長技自致富強之術頗蒙采納
六年冬西儒理君雅各招往泰西佐譯經籍遂得遍遊域外
諸國覽其山川之詭異察其民俗之醇漓識其國勢之盛衰
稔其兵力之強弱道經法都得瞻其宮室之壯麗士女之便
娟塵市之駢闊財物之殷阜與英之倫敦竝峙稱雄同爲歐
洲巨擘焉旣至英土居蘇格蘭之西境其地近北極少燠而
多寒春夏之交徹夜有光而山水清淑巖壑秀美遊屐所至
殊足娛情適志九年二月還粵此三年中老民以孤身往還
數萬里嘗登舵樓以眺望決目極天蕩胸無際波濤消其壯
志風雨破其奇懷未嘗不感愴身世悲憫天人擊碎唾壺淚
涔涔墮也老民旣還自泰西當事頗有知其寃者或貽書勸

其出山或欲託人招致幕下老民俱謝不往豐順丁公一代
偉人也尤賞識老民謂當今通達時務熟稔外情莫若老民
爲之揄揚於南北諸大僚於是諸大僚始稍稍知有老民者
嗚呼此老民生平第一知己也老民固極思感激馳驅以報
知己而憂患以來精氣消亡才華零腐旣不能上馬殺賊下
馬草檄又不能雕琢文字刻畫金石以稱頌功德徒爲聖
朝之棄物盛世之廢民而已辛未秋普法戰事起七閱月而
後定老民綜其前後事實作普法戰紀是書雖僅載二國之
事而他國之合縱綿交情僞變幻無不畢具於是談泰西掌
故者可以此爲鑑惟倉卒秉筆或患冗蕪尚有待於異日之
重輯而老民自知其必傳於後無疑己癸酉香海諸同人醵
費設印局刲行日報延老民總司厥事老民著述乃得次第

排印光緒五年己卯老民作東瀛之游藉以養宿疴滌煩慮
取道滬瀆放櫂金闕得重見故鄉風景闊別二十年矣真覺
城郭則是人民則非有丁令威化鶴歸來情況及身而重閱
滄桑生還粉粹固老民初念所未及料者也既至日東遍歷
崎陽神戶浪華西京諸名勝居江戶者十旬遍交其賢士大
夫一時執贊請受業者戶外屢滿壺觴之會壇坫之開無日
無之唱和諸作頗有豪氣中又爲日光山之游遍覽諸瀑布
窮其幽邃老民將歸日之賢士大夫錢別於中村酒樓星使
參贊以下至者百有餘人日人謂自開國數千年來所未有
也老民久居粵東意懲懲不歡恒思歸耕故鄉卜居於莫釐
鄉尉之間築三椽之屋招五畝之園藏書數萬卷買田一二
頃徜徉誦讀其中優游卒歲以沒吾齒顧是願卒未能遂豈

非天耶嗚呼老民雖流徙遐裔僻處菰蘆而睠懷家國未嘗
一日忘嘗言此十數年中時局一變髮捻回苗悉數蕩平左
帥用兵新疆擴地數萬里功震寰中威行徼外赫然見中興
盛烈然而泰西大小諸邦叩關互市輒以兵力佐其商力所
至各埠設官置戍艨艟相望每挾其所長從而凌侮我求必
應請必遂一旦齟齬環而伺我者數十國腹心肘腋間遍布
森列幾於國不可爲國矣嗟乎此蓋誤於羈縻之說而駕馭
未得其宜也近者日併琉球俄據伊犁我國家並持節往問
而時虞失和勢且岌岌老民外感於時勢之艱難內憤於措
施之顛倒舊疾陡發誠使祈死得死亦復何憾老民有弟曰
利貞字叔亨一字諳卿讀書未成名而卒年僅二十有七有
姊曰嫫字伯芬嫁吳村周氏癸酉六月先老民而逝老民妻

楊氏夢衡名保艾字臺芳娶僅四年沒於滬續娶林氏名琳
字懷衡一字泠泠經歷患難中與老民同甘苦老民無子有
女二長曰婉字苕仙歸吳興茂才錢徵早殞次曰嫻字楫仙
生不能言嗚呼老民旣無子矣而復奪其女不解造物者所
以待之抑何刻酷至斯哉自始祖必憲至今二百四十餘年
七葉相承五代單傳僅得男子十有五人老民以下有從姪
三人相繼夭沒於是自明以來巍然碩果僅存老民一人而
已天之所屬雖能與之天不獨厄老民而或將并以毒王氏
也恐王氏一線之延至老民而斬矣噫嘻不大可痛歎尤可
異者曾王父娶於沙氏大父娶於李氏父娶於朱氏其家並
無後老民弟娶於夏氏髫龀俱亡老民先娶於楊氏危乎不
絕如縷繼娶於林氏亦已不祀祖姑嫁於汪伯姑嫁於曹宗

祿始絕老民族黨無存密親蓋寢側身天地形影相弔豈天
之生是使獨歎老民每一念及未嘗不拔劍斫地呵壁問天
也老民少承庭訓自九歲迄成童畢讀羣經旁涉諸史雜說
無不該貫一生學業悉基於此自後奔走四方無暇潛心默
識矣父在未嘗盡一日養奉母居滬上扁舟道路甘旨缺如
而母氏絕無不豫色但最以忠義節廉而已老民母固知書
識大體四五歲時字義都由母氏口授夏夜納涼率爲述古
人節烈事老民聽至艱苦處輒哭失聲因是八九歲卽通說
部吳門旣亂母氏憂形夢寐逮老民遭罹奇禍母氏竟以憂
殞其生老民以此積慘終身痛欲刻心贖難糜體雖仍倫息
人世不可復爲人矣老民於詩文無所師承喜卽爲之下筆
輒不能自休生平未嘗屬藁恒揮毫對客滂沛千言忌者或

嘗其出之太易至於身遭讒謗目擊亂離懷古傷今憂離弔
逝往往歌哭無端悲愴易狀天下傷心人別有懷抱也老民
邇來潦倒頹唐百事俱廢去冬咯血至今未愈日在藥爐火
邊作生活深懼一旦溘然平生著述必爲人拉雜摧燒因先
將詩錄八卷檢付手民其餘藏於行篋者尙多不足供翻窺
覆瓿因病得閒聊自料理所著有春秋左氏傳集釋六十卷
春秋朔閏考三卷春秋日食辨正一卷皇清經解札記二
十四卷瀛壠雜志六卷普法戰紀十四卷四溟補乘三十六
卷法志八卷俄志八卷美志八卷西學凡十六卷麤鄙餘談
十二卷火器說略三卷乘桴漫記一卷扶桑游記三卷海陬
治遊錄七卷花國廁談二卷老鑿贅語十六卷遜窟讌言十
二卷弢園文錄八卷蘅華館詩錄八卷弢園尺牘十二卷都

二十有二種生而作傳非古也老民蓋懼沒世無聞特自叙梗概如此光緒六年夏五月下旬發園老民識於天南遜窟

詩評

采采流水蓮蓬遠春仙才妙筆由於天授七古尤見才氣豪邁橫掃千人蓋作者胎息於韓杜探源於風騷汎濫於溫李元白融會而貫通神明而變化之青邱秋笳之間何難別樹一幟壬子夏荷月朔日華亭弟張鴻臚讀於滬城客邸并識清新流宕雅近靈芬加以麗藻可躡溫李堂奧今人不必不如古人於吾弟益信天下才一石吾弟畧盡之僕亦磊落自負固不僅於長短句中討生活也雙鬢星星一無所就言之慨然近於此事亦不大作矣弟詩必成名家僕將來或附吾弟以傳則幸甚壬子首夏七日新陽碩惺滌盦氏識

讀言情諸什綺麗纏綿具見錦心繡腸玉溪生不得專美於前矣壬子仲夏十一日海甯李善蘭讀畢謹識

詞鮮月露思入風雲精銳走雷霆聰明淨冰雪其才固是不
凡壬子六月朔日華亭雷葆廉拜讀一過於海上詩巢燈唇
并識數語以示欽佩

大箸清蠶婉約深得靈芬神髓惟靈芬於宋人乞靈尊作於
晚唐入手樹骨實勝鍥而不已何難駕靈芬而上之甲寅孟
夏再讀一過於西人仙樓居寶山蔣敦復拜讀

意境超脫吐屬韶秀非絕世才華那能臻此江甯管嗣復讀
竟謹識

鉅稿淡冶秀蒨大有中唐人意境七古氣骨雄健思力沈著
尤不易及餘姚弟周白山讀後謹識

古詩俊逸近體秀麗其中精練處直欲韻頑晚唐所謂筆墨
之外自具性情吟咏之餘別深懷抱吾聞甫里遠山葱蒨綠

水迴環魯望而後必有才人於此益信時庚申重九小窓獨坐風雨淒然再讀一過書以志喜邵陽魏彥拜識
霍去病不好陣法岳鄂王惟事野戰仲弢詩境竊謂似之然有時長槍大戟中而仍復細鍼密縷則賢者固示人以不可測也湘鄉左樞讀過謹志

仲弢於學無所不通於詩亦無體不工五律多深穩七律多清秀五古兼參選體七古縱橫跌宕是瓣香於杜陵老者每讀一過輒爲擊節上元澄之弟孫文川拜讀并識

集中諸體皆工清麗芊綿似溫李排奡奇崛似杜韓至於激昂慷慨悲壯淋漓則又詩中之豪也才大如海固自無所不有陽湖沐愈弟吳新銘拜讀并識

少作綺麗纏綿自是才人本色至於身經患難目擊亂離則

哀思愁音坌溢而出其蓄之也有素則發之也有自杜陵詩
史夫何間然讀竟攝具三拜陽湖弟周弢甫臘虎讀畢謹識
清麗似金荃豪放似玉局憂國傷時悲涼感慨則似杜陵仲
弢詩境無所不包此謂健者秀水弟次公孫融讀後謹識
詞多偏宕孔文舉意主悲涼庾子山此郭靈芬句也請移以
評仲弢之詩秀水弟子辛伯源拜讀并識

清麗芊綿渾雄卓犖兼而有之一時作者惟江東老劍可與
抗衡旅慙夜雨挑燈讀之頓忘客居之感集中少作已自出
人頭地敢請出示全詩以豁眼界庚申三月上旬陽湖督貽
芳讀一過謹識

飛文揚藻采絢葩流自是君身有仙骨世人那得知其故光
緒元年四月朔日侯官林昌彝讀一過并識

統觀全集以靈慧之思運邁往之氣於亂頭鱗服中見天姿
國色始取徑于靈芬上追坡谷而秀韻則出唐人至窮愁亂
離更遭奇禍境愈苦筆愈蒼則杜陵之憂傷柳州之怨艾合
而爲一沈鬱頓挫卓然名家光緒五年冬十月望日吳縣楊
引傳讀過并識

越南黎調頓首敬啟紫詮先生閣下猥枉文旌兼頒雅範感
荷之私不可言狀承示滬上感事四詩廻環雒誦如挹清芬
諸作詞句雄渾情志憤激筆下有若飄風急雨之颯至而一
腔憂時愛國之心懸欵殷拳溢於言表益令人嘆息弗置夫
春鳥秋蟲物候之感乎詩者也山風海月境地之宜乎詩者
也惟有心人能一一以神明入乎其中發爲歌章芬芳悱惻
迥異尋常嗚呼人生於世才與遇乘則叱咤風雲刻畫金石

贊襄郵治鼓吹休明以先生當之夫豈異人任哉先生器識宏深才猷遠裕經濟之學抗古超今卽使聯翩直上揚世德而棟巍科亦意中事耳何乃鴻冥蟬蛻物外天全豐於才而嗇於遇蓋未有如先生者也以先生之才曾不見用於世未知造物者是誠何心豈天以厄之者成之歟抑蜘蛛隱而豹藏深潛高蹈而不爲世網所櫻歟此非鄙人思擬之所能及也調恭承簡命有香海之行自來三年於茲南闢五雲鈞韶在夢簡書是凜夙夜慙惶懼職守之難循歎世途之多舛逆旅寒燈蓋有不勝嗚咽者忽得是詩不覺胸中根觸感慨繫之惟是一行作吏此事遂廢案牘倥偬筆研荒蕪搔首撫鬚苦不成聲古人有云覓句天應悶狂搜海亦枯其調之謂乎不揣弇陋奉次元韻以博大方一笑三春行盡轉釀輕寒伏祈

慎護眠餐爲道自重

越南潘炳頓首拜手奉書紫詮廣文先生閣下炳銜命出使兩臨百粵今春猶小駐於香海韶光易邁芳序扇和花晨竹候喟然有洛沂風雩之思適蒙惠以佳籜奉揚之下如挹仁風對使拜登感荷無量使者旣退臨窓清坐朗誦所書四詩初不知爲何如也三復之餘風調邈逸意興清微如錦繡纂組相鮮以爲色宮商角羽互合以成聲不覺令人心脾俱爽古人有言曰詩以窮而後工是作也歌離弔夢而憫世思君之心溢乎言表以視楚臣出塞漢妾辭宮諸作其悲涼激楚尤爲過之是豈不窮不足以見先生之工哉夫傳巖版築顛菴簾瓢聖賢韻事獨有千古如先生者可以希之矣先生博物洽聞富有經濟當代名公鉅卿皆稱之爲未易才洵知人

也洵知言也先生勉乎哉勉而思之必有所合行將受知於
世黼黻朝猷贊襄戎幕而利澤及於人聲名垂於後堯舜君
臣事業胥自此矣輒不自量續貂奉正此外惟萬萬自愛

贈詩

閔仲弢詩率成五十八字

新賜顧

惺滌盦

不負狂名卽酒名劉又僻誕似先生海天涼月愁無際吳苑
秋風客獨行落魄十年還劍氣抗歌中夜裂琴聲賀回李白
從來少敢說吾詩老更成

贈蘅華館主

崑山孫啟架笠舫

高才夙懸欲疑年傾倒明珠錦瑟篇鄉里無多憐我在名山
有待附君傳自慙放逐爲遷客坐對清新想謫仙珍重今時
留息壤也應早蓄買山錢

相逢行贈沐盦仲弢

江甯何詠梅屋

塵海喧闐無可語斗大城中吾與汝邇來人事多僨傺况復
十日九風雨消愁君就杜家康論戰我思越處女有時拔劍

研地歌天壞王郎定相許王郎知名已十年賣文海上囊無
錢不似張騫心鑿空但憑驕衍口談天酒酣狂叫尋吳質醉
倒便藉華陰眠袖中奇句輒心賞豈獨神交寶劍篇人生幾
得團沙會是處相逢可傾蓋濯纓何必覓滄浪把袂未妨邀
駢僧行脚無端墮霧中舉頭徑欲游天外水仙不奏海山絃
萬壑一聲鳴地籟

調仲發

江甯何詠梅屋

王郎三十好青春家在吳東住瀕溟大隱愛招三島客小文
神似六朝人崑山片玉休論價滄海遺珠豈合貧我亦江湖
來泛宅願傾十萬買比鄰

謹呈子潛先生四律

嶺南蘭亭舊酒徒

之子清華擅相逢在海濱萍隨風所適葵願日當親素志稱

奇士雄心付逸民論交千里外遮莫有前因

忠憤寸衷繫他鄉念帝京中原嗟逐鹿率土孰封鯨駿業

思懲軾鴻才欲請纓攬懷篇什富詩句羨長城

亂世才多忌滄江寄此身龍雖潛勿用蠻詎屈難伸詞賦儕
班馬遺逢異渭莘玉成天意在豈遂老風塵

大造無寒歲焉知松柏心風濤堅晚節身世托知音著述千
秋重艱難十載深道腴堪自樂安用間升沉

贈天南遜叟

淞濱老圃楊引傳

鑄成此錯復奚言聊復潛踪似避喧大海應成水仙操夜郎
難白李生冤等身文字工新製滿目蓬蒿憶故園未卜一燈
重聚首秋蟲切切語空繁

長歌五百字奉贈紫詮妹丈吳縣楊引傳醒逋

少文山水遊向平婚嫁事百願具未了俄已成衰邁初夏草木榮欣欣盡生意古梅丈人行無復好風致飄蓬離本根同岑忽殊地寄我一封書相贈多珍異皎皎明鏡心惓惓盍簪誼文采更斑爛羅巾與香被其物旣瑰奇其情彌懇摯女子將有行云爲添餞筭振觸舊時懷言之輒歎歎我妹昔事君自慙百不備我婦出妝奩一一代簪計荆布稍光華坐待香車至絳帳舊生涯青箱故門第與君爲親串來往無猜忌維時各少年議論爭意氣青雲當致身自命廟廊器人事竟乖忤百憂催老大妹旣早夭折我婦亦憔悴世亂起干戈投淵寃珠碎罌風一夕來縷芳怨凋墜杜鵑枝上紅滴作眼中淚彈指二十年何事不堪喟君女早長成已得乘龍婿我女雖穉弱送之將結帨溯其垂髫時各已失所恃慘淡白楊風不

驚花姊妹偷生我與君已近知非歲懊惱百無成盈頭生雪
刺君尤邇奇禍幾爲虎口餌脫身東入海快哉拓眼界遠窮
二萬里不數張騫使異域雖云好豈得久留滯歸居粵海濱
冠裳雞椎髻年年有書來自述不得志瘴土秋尙炎頑山春
不翠文士况寥寂不得佳釀醉坐此起鄉心和屬落天外故
園竹樹蕪先塚松楸敗一二舊知交不死亦已艾何時得相
見登堂重設拜惆悵望南雲何以遙相慰勸君作達觀胸中
洗蕪芥著作既可傳精神亦宜愛當其鬱結時長歌聊取快
疎狂獲罪戾天心終必悔金雞下夜郎戚屬重歡會更製黃
絹詞引取外孫戲競折忘憂花獻與老人戴

感遇言情五言詩四十韻寄呈紫詮外舅先生

烏程錢徵昕伯

舊夢長洲苑
新居錦石巖
虞翻惟自恨
賈誼只傷鸞
燕鶴生先異
麒麟早不凡
何曾才是累
未免病于詁
器許經盤錯心
寧畏險峻雄文筆
繡虎健筆邁驚飄
陸海初傳箭
長星仰見機無聲
天墮狗有力地
生癰大局先蹶
缺孤城復鼓儻開張
元武陣浩蕩白龍祿
玉帳方論術金人偶失
緘營蠅俱止
棘射雉孰爲縱挺走
無殊鹿狂奔有類
鳬石梁浮遠遠銅柱
巖嶺市隱春堪賈
炊虛釜不點高歌惟洞
發異味得毛誠事
竟同張儉人誰宥
李嚴回看曾顛破
不語爲碑銜海運從魚
徙天空任鳥鵠
長途七萬里托命一孤帆
顧影斃如燭逢人
態似嘶乾坤容囁傲
世界更嘶嵌盡日仍彈
鉸嬉春或舞杖
思歸魂驅驅執別手
摻摻下士邛和駢
嘉烟玉比瑊元珠遭
棄置散木謝雕劙
落雙蓬鬢粗疎一老饑翻將鸞
鸞許

效燕喃喃雅誼惟當佩魚書定幾函論文殊沉澀味道敢酸
鹹柳舞須鶯喚花嬌仗蝶攬何時承贊歎與訪舊松杉掃徑
延三益誅茅築一影青氈王氏物白炳杜家鐃杞菊前身賦
芙蓉隱士衫生涯歸筆墨世網墮杯榦鉢擊從催句博開肯
立監煩襟千疊齡往事一叢芟息壤盟斯在明神鑒至誠令
修其共勉底用問巫咸

紫詮先生寄示近作郤寄

新甯余堯壽雲眉

新詩讀罷望南州太息驅人百事憂鳥爲驚弓勞遠翮魚從
脫網泄中流功名已屬雲隨眼鬢髮何堪雪滿頭翹首秦鞭
應早返繞朝心緒重山邱

時江南臨局諸君
議相先生同庵

走徧天涯不見人用陳一山比部句交遊到處氣嶙峋悲君絕域孤
淚愧我頻年獨客身賈誼有才空抱負馬周末遇困風塵

英雄落拓非無賴肝膽猶將古道親

讀諸詩後寄呈一律卽步集中頻年原韻

番禺李光璇星衡

蠻觸山川事日非可堪噭雁半流離長城信有蒼生託遯窟
宜酬故國知莫漫酙人猜叔子端防軼我過西師瀛墻指顧
圖方略赤手安瀾在轉危

奉贈仲弢先生

古端州羅兆庚蓉洲

久仰星鳳甚渴餓龍門今日得瞻依胸懸金鑑由天授筆捲
銀河作雨飛入世肝腸成木石對人談笑盡珠璣蓮花幕內
朋多少才學如君我見稀

偶成四律奉贈兼以留別

滿洲延譽桂山

生花一管絕塵埃海內羣驚未易才蓋世經綸偏不遇憂時

懷抱幾曾開高吟白雪今無曲浪說黃金舊有臺遙跡天南
綠底車美人香草鎮堪哀

斯人未合老巖阿經濟文章兩不磨幾見浮雲遮日月從知
平地有風波性因能定窮愁慣才到稱奇坎坷多古道行行
誰共語聲長空唱飯牛歌

英雄失路復誰憐絕域西來別有天遠謫夜郎唐李白親逢
織女漢張騫九歌鬼向山中泣一笑人從海外還贏得雞林
聲價重梯航爭蓄買詩錢

鍊金端勝賈新絲合鑄揚州杜牧之顧我獨醒邀我醉別君
太速識君遲淒清風雨書應達迢遞關山夢有知擊碎唾壺
涼夜永碧天如水易相思

奉贈紫詮廣文二律

萍鄉文星瑞樹臣

去國曾輕萬里游，感時翻抱百年憂。
苦將清識持危局，暫把空言當運籌。
同甫文章傳異域，魯連意氣動諸侯。
著苓自是千金品，憑仗何人樂龍收。

自信生平第一流，逢君今日合低頭。
名山事業爭千古，滄海襟期隘九州。
敢屈軍諮王景略，豈徒書記阮陳留。
古來材大難爲用，會見明廷側席求。

奉贈紫誼廣文卽以留別

越南陳希曾望沂

生平少年日，井蛙何太拘。
不憚天海隔，一爲長風遊。
白雲石嵯峨，珠江水淪流。
烟霞合靈鬱，胥漢擇羅浮。
趙臺與劉闕，千古餘山邱。
勝引得王子，雋爽今寡仇。
遯跡天涯南，窟竹素相優。
游著書有戰紀，精微獨旁搜。
詞鋒撼五嶺，筆力領全歐。
風會如轉丸，列國爲春秋。
縱橫數萬言，前箸無遺擗。
馮煖歎長鋏，

季子傷敝裘君才亦二子富貴非所求問君似君志當爲天下憂胡乃處林壑孑然一身謀君言堯舜世下亦有巢由人生各有命馳逐鷩所羞鯤鵬潛北溟蘭芷生芳洲燕雀豈相識蕭艾非其儔涵泓學子富卓犖才子優坎輶遇子困落拓境子幽雖然又何怨雖然又何尤不朽有盛事佳人惟信修愧我樗櫟材佐國無鴻猷中外界天塹東南風馬牛荊州此一挹親見五鳳樓殷勤接軟語繡段將何酬須臾惜分手臨風懷去留各勉日新志聲氣永相投寒潮湧素月天路長悠悠

讀紫詮廣文大箸寄呈

汀州賴其勸慧生

君不見海上騎鯨七萬里蛟宮蜃窟等遊戲足跡能令遍地球方稱世間奇男子又不見少年讀破萬卷書俯仰流俗留

真吾古人不作誰知已任教呼牛呼馬呼狂奴文章浩蕩驚
海國壯志顛連困磨蝎此生本爲著書來底事當年輕投筆
香海波濤一港幽片帆無恙且勾留寄語江東諸父老耻作
溫璣第二流先生醉後歌代哭飄泊天涯愁畫粥甕牖猶得
記餘譚麝煤光炳三更燭先生醒來哭當歌捃摭文字罪東
坡莊駢胥是謫言耳畸人寄託訛傳訛嗚呼有才不遇竟如
此薦禰難得孔文舉天之報她非無情厄君之遇彰君名君
不見武陽侯程將軍灌夫視之不值錢一文

賦呈紫詮先生用感事詩原韻

越南潘炳九霞

關山難越道途脩海上乘槎暫此留欲寄隨梅疏驛信怕聽
窓竹戰宵秋登樓幾度空懷古索句何人獨遺愁莫道乾坤
正多事四方已廢甲兵休

越王臺畔暮雲昏無際波濤湧海門已見囊錐騰寶氣誰將
匣劍拭塵痕江湖不棄謀臣略君上當事音多見如行草莽常懷聖

主恩憂患須知天意厚玉成利器辨盤根

惆悵風流往事空人生遇合聽蒼穹定知湖海多雲雁不遠
關山滯雪鴻大地環觀馳域外歐洲變局艸胸中歸來重補
衡茅集何日東山起謝公

閒寫黃庭一二篇端居多暇意欣然未應肥遜娛風月定有
元音寄管絃賈誼栖遲傷往日馮唐遇合是何年草廬未出
紆籌畫憂樂知爲天下先

賦呈弢園先生

嶺南王騫月槎

詞壇樹幟獨超倫海內羣欽學識真構思風雲窮變態揮毫
花草鬥精神登龍自昔稱佳士造鳳於今識可人章句尋常

何足道知君景畧是前身

露白葭蒼寄夙思清輝咫尺隔天涯葵枕獨抱三秋感荆範
徒嗟半面遲詩思每隨潮信長琴心只許夜燈知近來時事
關懷甚幾度携博欲問疑

奉贈紫詮先生七律四首 古猷州吳廣霖瀚濤
廿年飄泊遯南翁跋扈飛揚意態雄白也世人皆欲殺鳳兮
吾道豈終窮難消研地悲歌氣儘有登樓作賦風恰恨生才
才不用由來多事是蒼穹

一卷新詩集衆芬高樓風雨感君文名山早擅千秋業健筆
能開萬里雲本自多情同白傅那堪蠻語學參軍飛鴻避彈
翔寥廓不啻人間燕雀羣

碧海茫茫萬古流興來遙泛日邊舟閒尋覓風流跡且結

盧敖汗漫遊姓氏俄驚蓬島徧營花都付錦囊收少微此夜
生芒角百丈文光犯斗牛

愧我同爲東海客卑官抗俗走塵埃狂奴久已櫻時忌笑口
何期爲子開白璧青蠅甯足浼美人醇酒亦堪哀敬亭山色
珠江月落落寰中兩霸才

七古一篇奉贈天南遜叟

嘉應廖錫恩樞仙

神山雲氣滃而深神山芳樹鬱森森雲欲暮兮春在樹信思
空谷之足音我住神山已三月舊雨不來今雨歇俄傳門外
客星臨天南遜叟前通謁遜叟舊是吳中豪樹幟驪壇意氣
高一朝被謗遜南服看花飲酒快遊遨遊遨到處人爭識七
萬餘里經西極蓬萊神仙把手招挂帆又指扶桑國船至神
山十日留西都名勝甲蜻洲真山真水真圖畫付與才人筆

底收昔讀君詩感君遇今日逢君爲君訴立身須自定千秋
那管旁人來毀譽志存忠孝報君親不在爲官在爲人德行
本根文藝未高曾矩矱師先民刻楮雕蟲徒小技風雲月露
詞何靡君才實大出緒餘憂國憂時是詩史杜老浣花陸劍
南天南遯斐鼎而三他時刻就東游集寄與神山俗吏探

賦呈紫詮先生

日本龜谷行省軒

雄心欲著祖生鞭遊徧歐洲路八千慷慨談兵辛棄疾風流
耽酒杜樊川世無知己堪惆悵天付斯才豈偶然新史好藏
東海外芙蓉峰等鬱雲烟

卽席贈張園先生

日本川田剛甕江

漫遊乘興上輪船來泊扶桑日出邊著述等身人未老風塵
遙跡骨將仙豈求靈藥入三島欲訪逸書存百篇莫怪相逢

傾蓋久令譽夙自藝林傳

奉贈弢園先生卽和甌江韻 嘉應黃遵憲公度

神山風不引廻船且喜浮槎到日邊如此文章宜過海其中綽約信多仙司勳最健言兵事宗憲先聞籌海篇團扇家家詩萬首風流多被畫圖傳

奉贈仲弢廣文步甌江原韻 餘姚沈文發梅史

東泛滄波太乙船直道槎木斗牛邊誰知勾漏山中叟來訪
蘆敷海上仙蠻觸新書成戰紀源平遺事入詩篇雞林賈客
爭相問不讓香山萬古傳

賦贈弢園老民 日本增田貢岳陽

叩轅獻策靖邊氛未見酬庸報夙勸組練三千吳市甲背嵬
五百岳家軍避人常下南荒淚遜跡空瞻北闕雲自古奇材

終有用偉人江表定推君

讀紫詮先生詩文集賦呈

日本吉田次郎

觀遍歐西典未休飄然又作海東遊
五古 論勢文章洞五洲故國鶯花應入夢殊鄉風雨豈無
愁獻酬倡和新知足好醉江頭小酒樓

讀紫詮先生詩文遙寄一律

日本山本居敬

逸氣飄然事遠游滿腔才思湧江流詩過櫓
大集 繼辛得自由渡海客來傳著述趙風人競覓賡酬操觚嘆老
世皆是惟有先生未白頭

寄贈紫詮先生次吉田次郎韻

日本牧田彥作

先生豪氣死難休幾度東西異境遊明月秋高懷遠浦
人湖山以 薦賦詩橫槊何多感把酒看天特破

夏半夢香洲

詩人湖山以 驚川屬香洲

賦詩橫槊何多感把酒看天特破

愁笑我平居作牛後呼盃獨上庾家樓

聞紫詮先生西來賦此寄呈

日本秋永照隣

不擬蓬萊探藥船東航探勝賦詩篇山浮富士千年雪日湧
扶桑萬點烟詩境悲涼同島佛文才跌宕比坡仙元亭如許
停車訪欲結將來問字緣

卽席賦呈紫詮先生

日本石川鴻齋

驚見文星照海東才人遠近盡趨風公超到處門爲市孫綽
從來賦最工步詠花陰傾玉檣坐吟月下撫焦桐只看鳳鳥
翔千仞難縛中原結網中

宏名騷耳恰如雷何幸今朝共舉杯台嶽雲深仙客杳江城
日麗碧桃開衣冠夙謝三公貴草莽還占八斗才更羨胸中
富文史飄然駕鶴下蓬萊

席上呈發園先生

日本狩野良知

逍遙海外作鶴遊足徧東西歷數洲意氣乘風濤萬里文章
經國業千秋功名不願記雲閣轍跡且期周地球猶有謫仙
緣未了何妨詩酒託風流

賦呈漫園先生卽以志別

日本中洲三島毅

孤帆千里抵雲天采藥來留蓬島邊江左賊由奇策定泰西
戰待鉅文傳交情不隔道猶古吟骨惟疑人是仙何事秋風
促歸去陽關一曲入離絃

聞紫詮先生將歸賦此寄呈

日本中村正直

飄然乘興日東遊才學如君之匹儻筆役風雷多逸氣胸羅
星斗足奇謀久思對榻縱談未能肯命車來訪不那忍匆匆
分手去天涯好會再難求

卽席賦呈并送南歸 日本湖山長願小野
幾度飛毫賦遠征大洋又大東瀛却嗤霞客游踪窄最愛
雲臺學術精芳草綠波他日夢紅絃珠唱此時情也知新著
刻成近署否老夫賤姓名

席上呈紫詮先生兼送南行 日本巖谷修誠卿
光怪驚看太陸離泉源萬斛湧文思杯槃對酌猶新識肝膽
相投卽舊知品紫評紅溫尉什傷春惜別杜陵詩賤名喜入
柳州筆探勝晃山攜手時

聞紫詮先生將行寄呈 日本本多正訥

夙聞吳地有詞仙萬里遙浮徐福船早識文章關至性獨從
忠孝得真詮問奇誰識揚雄字獻策長留賈誼篇莫厭天涯
淹滯久相邀爭設主賓筵

奉贈天南遜叟

日本朗麗阪谷素

乘槎破浪走龍蟲想是東游逸興多自古奇才遺貝錦平生至性託黎渦欽名欲下陪翁拜壘國時聞杜老歌丹酒如泉澆塊壘伊丹產
美酒淹留且養碩人遊

席上賦呈紫詮先生

日本丸山鑽子堅

扇影衣香罨畫樓酒邊涼意暑初收縱橫詞筆貫天地磊落胸襟凌斗牛羈客情懷逾杜牧新橘風物勝揚州流連只合長今夕楊柳如春月似秋

翌日再呈重用前韻

日本丸山鑽龍川

高蹈常輕萬戶侯乘槎又作海東游媚山明水入吟眼闌雨長風牽客愁夙讀著書神旣往相逢傾蓋意先投他年我亦西行客詩酒追隨君許不

席間賦呈紫詮先生

日本關根擬堂

天子呼來不上船用句乘槎萬里忽飄然囊中詩刻三千首海外名傳二十年餘事觀風仍紀俗高情攜妓又參禪揚州花月寥寥甚久待豪遊騎鶴仙

奉贈弢園先生卽送其歸粵 日本龜谷行省軒

人中之龍文中虎弢園先生卽同甫張贍明目論時機赤日暾暾披雲覩粵賊凶燄滿乾坤激昂獻策叩轅門雄志未伸賊未滅橫罹奇禍銜深冤一朝決策遊西歛長風萬里逐鵬搏英雄割據尙未已虎視龍驥互相吞與亡古今幾感慨抽筆窻前鬼哭喧歸來頭白不稱意飄然又到扶桑地聞說扶桑有逸書欲搜小酉識奇字余亦東海一狂夫氣凌虹霓才本迂讀書萬卷歸畫餅空餘傲骨老窮途相遇論交江樓夕

綠酒淋漓披肝鬲興來起舞蛟龍驚詩成金箋紅袖擘灑墨
直傾長江水揮劍擬鏟遙山碧忽聞驪謁激秋風白雲慘澹
雁橫空一別萬里恨參商幾時追逐學雲龍君言丈夫一世
歎髀肉精神應注著述中嗚呼青紫紛紛不足論何如開拓
萬古之心胸

從神戶寄和弢園老民 古猷州吳廣霈澍濤

仙雲冉冉集蓬山且向林花一解顏我愧東遊櫻世網君應
南去閉柴關高談落帽驚飛鳥急電穿櫺檻小榦煮酒英雄
今在否幾回懷古看刀環

天生名士紹風流世事無勞借箸避禍田橫猶島國談兵
杜牧自揚州驚心作客徂三載稽首求仙向十洲閑立高風
同拍手謝他肉食運奇謀

海頭遙指白虹生灑酒勞君進一觥學劍漫愁無利器攻詩直欲比長城王孫乞食潭無賴阮籍狂歌太不平舉世滔滔誰與易天教沮溺好同耕

湖海元龍氣自豪眼中今日見王韜論心不覺領三雅養勇何妨挫一毫醉臥有時懷管樂笑談無語及蕭曹東方桃李君裁偏贏得浮名北斗高

贈紫詮先生

番禺梁肇晉少亭

西遊已倦倏東遊遊遍瀛環大九州海上三山歸巨眼天涯萬國數從頭不聞杜甫依嚴武應有常何薦馬周無奈小儒多咲舌五都羣詫夜光投

寄呈紫詮先生以志景仰

嶺南王騫月槎

鴻才自古出鴻儒經濟文章曠世無雄辯天生王景略妙詞

人羨阮元瑜平生意氣空千載遠道烟波夢五湖羞向終南
趙捷徑誰知抱負有驥珠

花落閒庭草滿除間奇有客此停車匡時愧我空談策垂世
戀君獨著書望氣竟從三島外知音還在七絃餘東山不奪
蒼生願終見商霖展夙儲

余將北游津門席間賦呈弢園先生并以言別

日本曾根俊虎嘯雲

去年聞君靖洲京詞壇遠近傳君名今年見君海國城綺筵
跌宕懷君情目光如電氣蓋世識論叱咤風雲生君言讀書
不得意頭顛如許無所成君昔壯遊萬里外西鄰冰海東蓬
瀛阿蘭觀日卯真宰扶桑溫足恢前程膚背三千秘文字胸
中十萬藏甲兵惟君襟懷多磊落攬轡壹志圖澄清方今歐

亞相竝峙厥勢強弱難抗衡藩籬盡撤屏障失譬如大履將
頽傾我思古昔益慷慨時欲呼天鳴不平中朝與我辱齒國
結好况是稱同盟一心併力足禦侮闢牆何暇爲門爭君之
所見與我合有如鸞鳳鳴同聲東來倉卒不久住高樓置酒
送我行檣櫓急向當筵奏異方聞樂心怦怦我今別君請自
愛慎毋痛飲如長鯨北游燕趙多奇士屠沽意氣輕公卿彼
自悲歌我擊筑酒酣各自抒愚誠明年春風二三月萬楊柳
絲千花明我將與君再相會當須一飲三百觥更爲喚取雙
明娥親煩玉手彈瑤箏一曲旣終意未盡掛帆自此賦長征
君雖不遇慎勿疎隱居坐待天衢亨

小住香海感成四律奉贈

漢軍玉仲蘊 磐

山陬海澨記游蹤選勝搜奇見此翁拔劍一時同斫地高談

四座可生風倘論豪氣應千古誰向詞壇角兩雄笑我悲歌
同阮籍猖狂端不爲途窮

天涯執手一長吁時局翻新異古初仗節未能降冒頓快心
幾見襲扶餘虛言桑景橫磨劍寶事南狐直筆書

君所著書
所載近事

大都實錄話到百端交集處酒酣抵掌意躊躇

紛紛海若忽揚塵漆室燈昏太息頻議論難爭秦典客縱橫
惟見魯行人誦詩三百談何易下筆千言倘有神材不材間
無位置敢將蹤蹟感沉淪

早知文字誤平生楊意難逢眼未青狂論敢緣知己發罪言
休使外人聽沈酣典籍歸無用餉啜糟醕悔獨醒胡蝶夢周
原爾爾且隨海運徙南溟

余時經之海南

蘅華館詩錄總目

卷一

古今體詩一百四十八首

卷二

古今體詩一百三十一首

卷三

古今體詩八十一首

卷四

古今體詩七十九首

卷五

古今詩體一百三首

卷六

卷七

卷八 繼出

右詩五卷都五百四十二首光緒庚辰五月下旬遜叟編次
既竟付之手民嗚呼余敢以此自信爲詩而竟欲問世哉惟
是三十餘年來境遇閱歷悉在於是展卷披吟秀鬢可憶存
之聊足以見我性情云爾余行年五十有三矣日月逝於上
體貌衰於下文章未就事業無成遙望故鄉相隔萬里頭白
齒危未有歸期局促一隅嘯與倡和親朋旣絕嗣續永無魂
魄一去同歸秋草以此思哀哀可知已是則因編此詩而淚
又不禁涔涔下也

蘅華館詩錄卷一

長洲 王韜 仲弢

不忘

欲從太上證靈修不忘鴻泥此小留轉眼鶯花人似夢當頭
樓閣月如秋青山有約空埋骨紅豆前生早種愁墳海補天
應亦易相逢今世合休休

無端風雨困黃昏獨替花愁早閉門籬裏尚存新韻本壺中
已凝舊啼痕生無可樂何辭死情尙難忘况受恩灑盡悲秋
叢菊淚荒江寂寞臥楓根

玉色瑤情一瞬空幾回呵壁叩幽穹簾前語不聞雙燕地下
書難寄隻鴻但有離魂來夢裏徒懷同命各心中燈昏酒冷
誰消遣強起懦豪賦惱公

惆悵詞成錦瑟篇歌離弔夢總淒然一生恨事空花月半夜
哀音逰管絃莽莽寒煙埋宿草茫茫逝水送華年藥爐茗碗
無聊日合寫楞嚴懺悔先

吳江徐仲寶至

去年人日君始來草堂喜報梅花開今年君至已晚矣梅花
如雪落江水一度花開一度思今年人非去年時名場徵逐
不得意出口都成危苦辭方今俗學工相皮文字高寒識者
稀讀書豈徒弋科第力古乃不救寒飢吾黨徐生異庸衆能
出清聲憇羣闕祖孫父子皆妙才詩名詎以隨園重謂君祖
山民先

生飢驅飢驅且出行書生意氣輕公卿朱門三重未敢通甯
賓臯廡依吳中吳中至此路尤近片帆落手天風引杞菊誰
堪作比鄰昔日名流今已盡王微本不好詣人里居寡權跔

步窘我欲乘風作遠遊與君嘯傲凌滄洲

小飲青蘿山館呈顧滌龜師

欲雪不雪天釀寒啾啾凍雀愁簷端地爐活火聊取暖一尊
入口餒顏歡新坼甌泥出餉客香浮色淡味獨完吾師不飲
好人飲尤喜脫畧禮數寬王郎本耻作小戶深盃不厭一吸
乾酒闌每易生感慨敢抒愚論披心肝伊昔操筆纔舞勺其
時我猶未識韓文章疏解蒙公許豈有羣書卓犖觀今日幸
備弟子列步趨敢曰升堂難中吳詩學久不振誰執牛耳雄
高壇金陵流派工鍛蕩公其挽之排狂瀾佻淫積習冀一變
目笑羣兒肆擊彈靈芬秋水雖後起清新漸趨爲雕刊怪公
閉戶坐寂寞却來賣藥供朝餐再拜陳詞敬請益空仰邱坂
心愁歎

送徐仲寶之吳門時亦有錦溪之行

空堂相對雜離思秉燭宵分聽漏遲
今夜月光同領畧明朝帆影各參差
功名大有衰門感文字難期末俗知
澱曲孤雲吳苑樹憶君最是落花時

渡范遷湖

朝暾射窻喧雀聲久苦寒雨喜新晴
舟子曉發叩門至持書促我錦溪行
錦溪此去只廿里風便掛帆頃刻耳
春水漣漪漲平蕩漾荷藻生空明小艇搖搖日未午
大河前橫路若阻煙深岸闊不見人獨聽空江響
柔橹此湖舊以鑿清名水色澈底玻璃清或云范遷家至此間
湖濱卜築名遂傳當年功就知機早一舸載得西施好
屢散千金溷俗賈上士大笑未聞道晚年想已厭網羅乃來此地
娛烟波嗟予亦爲名

利縛何時歸釣隱邱壑

飲錦溪書舍示主人

吳淞廿里錦溪頭天風送我扁舟遊主人築室鄰之麓門前
新漲一江綠短草緣階青滿庭雜花映戶紅入櫺此齋地位
雖偏促安頓書倉亦已足仲宣乞食來此邦忝與主人羣紀
行主人爲具酒一石呼與鄰翁相對酌嗟我結廬淞水東年
來飄轉如飛蓬人生苦爲微名累不然種秫謀日醉但力耕
田間讀書安辭長作農家居未知此樂何時有吾言不食如此酒

遊里東僧寺

遙指寺門處蒼然夕照沈石堤故盤曲鐘閣極蕭森環木長
春草推窓驚暮禽地需幽僻好何必羨山深

小樹花初著殘僧茗自煎林煙團處暝櫓月墮來圓卽此幽
棲地居然八九椽結廬何日遂石瀨溜涓涓

錦溪僧寺讀墓碑偶作

錦溪本名陳墓俗傳宋南渡時陳妃瘞此故名今墓
在僧寺左旁斷碑嵌置壁間字跡漫漶幾不可讀然
大要一達官塚耳拾遺之廟小孤之山沿訛久矣不足辨也

吾來錦溪柳已絲偶閒步屢游叢祠高隣曲折石犖確其中
四面皆成池爲搜陳跡來相訪參差樹影江流漾簷前微雨
朝初晴湖中新水春來漲一角低迷林外煙靄然有冢峙其
間殘葉隔年猶未埽誰於此下酣長眠云是高宗昔避敵後
宮佳麗隨君側風塵憔悴陳妃子惺忪疾病難起可憐不

得同輦行一朝簫管葬傾城我聞此語心未決五百年來驚
倏忽上天空見玉棺臨下世徒傳金盞出宿草紅心帶弱魂
半鈎冷月照黃昏明眸皓齒千秋劫寶幡羅裙雙淚痕風飄
衣上桐絲落野棠自紅水自綠牘脚摩挲徑丈碑剔苔剝薜
文堪讀字跡依稀辨未明約畧勸業言平生鬚眉致屈爲巾
帽向來顛倒從人情今人好色盡如此相沿紕繆何足耻回
首笑問南能僧始知者老言無徵真娘墓上題詩慣蘇小墳
識西陵幻後賢憑弔徒紛紛明妃青冢何人見嗚呼帝王陵
寢且飄零惟此坯土獨得長共溪流清寺僧聆我論不辨微
爲鶯鵡噪屋角三兩聲但見落日山頭橫

坐愁不寐池月上窻靜中有覺紀之以詩

蘿壁上新月竹徑團晚煙茶館水自沸藥鼎火宿然散髮坐

成夕涼風來衣邊燭滅生虛白幽人應未眠蟲聲窻隙透花影牆凹穿空庭寂無語此意誰爲傳

接家書後邵寄

一紙書來仔細看先看紙尾署平安春深猶有餘寒在路近
何愁欲寄難小病無因偏止酒十行相訊勸加餐蠻箋燈下
匆匆寫便數歸期半月寬

夜坐

安置詩筒併酒尊孰憐丐食滯江村瓦跳沸聽茶聲急羅壁
搖看燈燄昏花補籬凹疎有影月斜屋角淡無痕故鄉舊侶
應相憶重聚西窓與細論

偕同人泛舟吳門夜泊滄浪亭

放櫂吳淞口扁舟過野塘三人情自永卅里路偏長溪草隨

波綠籬花隔岸香倚檣無限意不覺暮雲蒼
約略水程盡猶從郭外盤山銜斜日下風急客衣寒學業慙
書劍音塵困鳳鸞所思不可見懷抱幾時寬

小泊滄浪側鄰船笑語聞聯詩多未竟中酒已微醺思爲離
鄉雜情偏與友殷昔賢曾此隱想像感遺文

燈炪更闌後紛然酒欲醒去家原未久此路亦頻經鄉夢如
雲住人聲隔水聽歲華空復逝慚愧鬢絲青

書所見

桃花門巷鎖歲華解識春風見一枝隔岸好山先露面照人
新月宛成眉鶯鴻影斷迷來路覆鹿疑深繫去思不待重尋
已惆悵等閒吹白鬢邊絲

縱不相思亦可憐每羞憔悴在花前淡雲有影流如水殘夢

無痕化作煙明日天涯從此遠今宵燈畔未成眠姑蘇臺下
紅心草多恨多愁總夙緣

題畫蝶

夢魂栩栩繞階前苦戀春光祇自憐芳草王孫今已老落花
如雨雨如煙

初夏

柳絲踰地柳絲颺簾外桐花風送香春去亦如人易老事忙
偏覺日非長鷗鴟隔夜猶啼雨蝶夢家時過牆清簾生紋
涼似水且從晞髮一徜徉

錦溪寄懷詩四首

顧滌盦明經師

青蘿館裏碧琅玕一片陰森六月寒曾否新詩鈔十手定知

好竹長三竿文章小技慙翻籍衣鉢名山託柳韓大藥駐顏
容市隱廿年高臥此袁安

楊醒道茂才

身世悲涼感不禁哀音淒戾失巢禽蜀都風月愁無際故國
冰霜歷已深更少衣從沽酒典祇餘詩爲送窮吟東歸常下
依人淚一臥江鄉百慮侵

徐仲寶秀才

繞里梨花三百樹閉門中有草堂幽葉承名父終傳世詩到
才人例感秋八月波濤飛白下一簾煙雨夢蘇州鱸香領畧
功名小搖落江鄉爾許愁

懷舊閣內史

不是愁中便客中生憎勞燕各西東才人例不登金榜仙子

應還住玉宮曲柄簾波看瑟瑟廻廊展點聽弓弓銀河咫尺
如天梯只有宵來綺夢通

夏日讀書迦陵精舍

復作歸歟想扁舟至里門蹉跎慙未補文字向誰論岸遠疑
無樹雲深若有村暮鴉斜照外帆影總昏昏

小築通幽處禪寮靜不嫌簷香風入牖蕉綠雨侵簾爲拓三
弓地能消九夏炎短椽容我借檢點置書鋟
竹影碧團蘂薰然六月寒涼颺來戶牖落葉上闌干有約應
相踐無花可共看西風吹不歇窓外咽聲乾

伴石花偏好窺簷月又圓若能占五畝亦欲構三椽築室當
松下開門臨水邊圖書叢裏坐把酒意陶然

咫尺麟簫寺高僧亦偶逢畫閒時隱几日暮又聞鐘磬竹鳴

秋急牆花弄影重簾紋如滑笏高臥正從容

煮茗初聽沸看棋偶遺忙桐陰當晝靜薤葉過風涼清坐情偏適深宵話更長懽然團聚久此樂莫相忘

夜起

羅月淡掛壁夜深萬籟寂星稀看或無露重聽欲滴寒蟬啼近人燈裏語唧唧秋士聞秋聲使我心中惻况復送遠風高樓正吹笛

偕朱彊卿夜集青蘿山館明日將同發白下

屋山晨聽乾鵠啼故人有約來錦溪布帆無恙秋風快停舟繫纜聞午雞忽地吾師折柬招相期剪燭娛深宵隔竹茶煙清若水夾松月影冷於潮觸熱披襟當牖北牖邊樹影濃遮屋疎疎小雨晚初晴娟娟淨綠涼微生廻憶疇悰亦已久可

知今會原非偶半載常深似海情一口欲吸如淮酒酒盡更
闌話漸稀更添涼意上生衣牘陰欲歇寒蟲語簾裏忽見流
螢飛此時相對情獨絕天上星稀乍明滅簾角紋生衆籟寂
竹梢露重數聲滴今夕何夕共此堂明日之日官道旁白門
一片秦淮月又爲他鄉念故鄉

自滸關至丹徒舟中所得絕句

曉關十里散涼煙尚見星光照水邊岸上露蛩啼不歇樹痕
濃護佛祠前

行經南望亭邊路高岸廻潮曉夜潭却羨數家茅屋好隔籬
竹裏自開門

獵獵船旗颶遠風黃茅蓋屋土成墉一堤烟柳橫林近正好
泊舟聞暮鐘

丹陽城外暫停櫂雨過山痕淡欲消苦憶新豐佳釀熟隔溪
村店一宿飄

雲氣半江涼欲雨水痕兩岸暝成烟舟行要識秋來處盡在
蘆花楓葉邊

板牀竹簾夢難成底事秋天未肯明愁思連朝偏爲酒聊拈
詩景破鄉情

夜行

夜來微雨斷燈影出孤齋歷亂墮流螢扁舟過兩岸

小泊七里江

繫纜平橋晚楓林正落暉榜人閒倚櫂水氣暗侵衣圓月翻
波碎孤雲待族飛遙看煙樹外漸覺過帆稀

舟膠新河中乞潮伍相國

繫舟樹下等潮閒再拜靈胥奠酒一杯江岸濤聲成險壘吳宮
草色上荒臺千帆迎水鳥檣集一線衝波白馬來淹滯征途
向誰告急投詩句敢相催

黎明渡江卽事

一片喧呶客夢驚篙師解纜促舟行依微岸遠秋無際浩蕩
潮來夜有聲殘月不明猶掛樹布帆無恙更催程曉烟欲散
啼鴉起好景濛濛畫未成

風雨聲如萬騎連奔龍澎湃挾危舷河山自古分南北波浪
無邊接地天出沒江豚夜吹霧翻騰水怪曉飛涎好將枚叔
吟秋筆寫出觀濤賦一篇

夜泊白下水西門

帆檣羣赴水西門遠寺鳴鐘晝已昏六代江山餘霸業千年

草木入燒痕遙憐北固分秋色莫話南朝愴客魂兩岸歸鶴
寒意重篷窓風雨與誰論

剪燈相對兩茫然約畧行程間長年三日渡江風絕險終宵
傍岸雨如懸隔船人語聽偏寂到枕潮聲櫬不眠準備輕舠
湖上去莫愁渡口問前緣

至寓齋作

事業前朝付劫灰秣陵王氣亦堪哀過江詩爲悲秋作捫石
人誰訪古來室借三弓閒憩足酒須一石客懷閑釣魚巷側
秦淮畔應有簫聲到鳳臺

秋來芳草遍閒庭一桁疎簾六扇屏牆缺正當殘樹碧屋低
不礙遠山青疎花入夜窓無影涼月著人醒未醒剪燭更關
渾欲寐那堪舊事話零星

欲寄

尙憶前番握手時未行先欲問歸期最憐離別牽紅袖反怨
功名鎖翠眉乘月輕帆偏猶猶和烟衰柳尙絲絲金錢長夜
休頻卜爲有禮郎絕妙辭

新寒幾日襲簾幃旅思紛然願總違劣有心情連日醉祇餘
魂夢昨宵歸夜深愁聽百蟲語月落驚聞獨鴈飛只恐夜涼
花下坐露香風警透羅衣

疏簾隔斷一溪煙叢鬢長眉絕可憐碧玉工愁偏此日泥金
寫帖是何年詩題桐葉人雙笑被冷蘆花客獨眠細雨黃昏
無奈甚殘燈明滅短窓邊

過伍相國祠

伏劍竟身死夫差豈霸才恩仇何所見忠孝半成灰秋至潮

聲壯春深鳥語哀胥江祇尺土荒草上蘇臺

過古廟

金粉荒涼舊事非深林不見鷗鷺飛尚留斷碣苔侵石惟有長松葉墮衣隔岸寒雲殘照暝閉門疏雨過人稀前朝典屬從何問遙見牧童烟裏歸

白下雜詩

皆寓齋紀遊之作策蹇之辰擎舟之日偶有所歷輒錄於篇

年年簫管泣秋風丁字簾前燕影空偶見隔湖小兒女鬢花簪得可憐紅

秦淮韻事半成煙人影衣香爲惆然我是年來銷綺夢忍彈舊曲聽么絃

薄陰遊女晚來稀妙相菴邊樹四圍隔著垂楊剛見得不知

微雨濕秋衣

莫愁湖畔豈無愁水閣珠櫳盡下鈞郎自乘船妾鼓櫂綠何此水慣分流

我到隨園日已昏從前壇坫渺無存風流雲散難追憶月掛烟蘿微有痕

裙屐清游久寂寥秋墳詩鬼暗魂銷絲絲弱柳疏疏月盡把與亡付去潮

景陽宮殿久成空豐草蒙茸臥巨鐘井底寒泉流不歇但聽四野亂啼蛩

秋水文波碧似羅吳儂船上聽吳歌誰家燈火簾櫳遠纔到鐘鳴月滿河

遇雨將欹巾一角衝泥幾悞路三叉清涼山下四圍碧盡日
騎驢自看花

鴉帶寒雲入遠村荒祠斜日淡秋痕滿山黃葉落如雨愁聽
疏鐘白下門

秦淮卽事

來遊最好晚晴天約上秦淮泛畫船十里鶯花供跌宕兩河
簫管艷神仙消除豪氣惟詩裏飄墮情懷到酒邊兒女英雄
皆本色借將絲竹遣中年

綠酒銀燈水上樓湘簾不捲最宜秋怕聞折柳桓伊笛誰識
迎桃子敬舟浩蕩波光銷客恨朦朧月影替花愁隔湖絃索
殷勤弄觸撥柔腸不自由

淡煙輕粉事荒涼尙憶風流說頓楊南渡笙歌成好尙東皇

花月寫文章何來畫鷗衝波遠幾見驚鴻隔浦翔只有簾前
雙燕子年年此處度秋光

暮煙漸淡細波生檻外嵐光畫不成雙槳人來曾有約六朝
山好半無名銷磨年鬢綠多病蕭瑟秋風未放晴纔見湖邊
簾盡下衫痕黛影自分明

留別秦淮

到此日無幾別時情自生潮痕常過岸樹影半圍城水碧留
人住山青送我行蒼煙斜照裏願與爾同盟

放櫂從茲別垂楊綰客舟煙波如有意鷗鷺不勝愁殘月初
醒夢寒花欲殿秋所思渺無際相約待重遊

夜坐

此夕風寒酒易醒銀屏時見墮流螢隔窗燈影涼於水長夜

無人月到庭

反遊仙詩并序

顧滌盦師嘗作反遊仙詩大旨謂殞霞餌玉通人寓言不如積碩學爲世用僕本無心仕進讀吾師詩悚然久之自念秉才既弱輒遭摈斥蓬萊清淺渺若登天設使浮榮有耀而此中已搖則平日所以自勵者安在也至遁跡山林或可藏拙亦心鄙之矣因亦作

反遊仙詩以見志仍用郭景純原韻

鷓鴣林樾巢鸞鳳枳棘棲不見古達人奮跡起草萊叶長生亦有盡安事擷仙萸抗心太虛表躡足青雲梯巖規莊惠友鼈勉黔黎妻操守苟不堅局促決藩羝置身固何若當與冥

鴻齊

靈秀在天壤燕齊有奇士著書宇宙間邁迹雲霄裏羞識黃
石公肯隨赤松子謂彼終南山仕宦捷徑耳風流久不作乘
時當崛起屈膝求寵榮紛紛何足齒南面擁百城點筆任驅
使

草木托與微春花何娟鮮避世者誰子藏拙處深山叶仙何不
勵志節易轍而改絃食必炊仁粟飲必酌廉泉榮華與彫枯
轉睫皆雲煙學問存其人道德誰仔肩士貴希聖哲緇懷千
百年

清操可長存浮榮知易謝蟲鳥變春秋裘葛思冬夏蓬島至
蒼茫桑田微變化西笑向長安願言稅我駕獻策旣不遇且
自安茅舍窮則善其身何事徒悲咤

朝市亦可隱杖策思獨遊貧賤洵堪恥將泛皇都舟豈敢躁

自進金馬門可投松柏勁寒歲桃杷翠晚秋滔滔斯世人嘆
惜誰清流

文字固憎命詩書能爲災此中貴自適咫尺皆蓬萊泉石不可託奮步翔瀛臺願預鑄洛宴隨流飲瓊杯典策獻天子妙語解人頤叶一旦置通顯英名擅八垓豈食不死藥年老亦

反孩管樂志有在終非百里才

鉛汞即可燒迂誕奪其魄朱顏已非故元髮倏變白勸業不早建零落隨蘿柏陳饁發殘書青編展日夕至理抉精微羣言盡瀝液偉績著旂常豐功垂金石俯仰天地中皆爲寓居客

秋月

悄剔銀缸結繡腸秋風吹墮十分涼水晶簾薄光難隔翡翠

樓空夜正長四野無聲寒玉笛半欄斜影倚紅妝離悰別緒
情偏遠但祝團樂願早償

不寐

烟蘿四散風入幕湘簾半捲月掛壁不寐披衣夜深起側聽
空階殘露滴

簾

怕有風時垂密密更無人處護重重日長已是少情思睡起
微聞花氣濃

錦溪詩社小集席次呈陳松瀛孝廉

建豎壇坫伊誰功拔轔立轔詞中雄我來妄擊雷門鼓森嚴
壁壘偏師攻席上更逢驕叔夜召俊西冷氏才性寒微世間孰識狂次
公處仲嗤壺敲欲缺抑塞磊落抒心胸無才我自愧刻鵠人

言此老其猶龍屈服張華走成式解經不窮戴侍中邇年我
亦懷述作揚雲小技嗤雕蟲快讀奇書固所願敢誇健筆無
不工石銚水沸春茗碧羅壁影搖蠻燭紅人生如此致足樂
何必食粟千萬鍾

冬夕

蕭蕭牆外竹聲乾霜重樓高夢亦寒人在西風正惆悵又吹
落葉上闌干

夜起

夜闌夢醒人初去起窺窗戶疑何處高樹風寒鳥欲啼空牕
月墮天將曙

無題

連日輕陰不下樓花叢雨過濕簾鈎隔簾蝴蝶雙雙見剛觸

儀心舊日愁

舊時庭樹尙依然小別無端已一年記得扁舟湖上過岸花落盡雨如煙

樓臺寂寂雨浪浪到此離愁總斷腸相見千回皆夢裏醒聽落葉走廻廊

剪剪西風透碧帷近來消息斷聞知不堪又到黃昏後纔上銀燈客去時

門前絲柳帶寒痕往事辛酸欲斷魂無計著書且閉戶檠爐經卷度朝昏

入春寒甚多雨

自入春難十日晴連朝愁聽鷗鴟聲晝沈沈雨疏還密夜澹澹燈昏復明江上雲猶如絮厚門前水又逐潮生小庭花草

拏無著要乞天公不世情

一舸

惻惻輕寒滄滄流又從一舸到江頭鴛鴦並世難同命蝴蝶
前生幻宿愁若問桃花原未嫁漫猜芍藥定相留青衫淚點
紅箋字此願難償分已休

偶言小別蹙雙蛾只爲情深怨亦多隔岸鐘聲驚短夢題裙
詩句托微波鳳鸞消息常飄泊蘭絮因緣慣折磨簾外流雲
時作暝薄寒猶著一重羅

春來百感正茫茫又著離愁更斷腸伴我寒燈昏似墨照人
殘月冷于霜夢爲離別都成淚魂入溫柔別有鄉作繭紅蠶
多自縛宵闌再拜炷心香

紙閣蘆簾已有人偏能偕隱不嫌貧明粧謝艷羞花比翠袖

生寒倚竹頻悔我多情徒自苦憐渠小病豈無因篋中猶剩
羅巾在願寫心詞禮玉真

蝶

如雨如煙夢裏花卽非夢裏亦天涯文章金粉終何用身世
飄零空自嗟萬里家山春已老一生風月念多差凝魂休戀
墻前地咫尺簾櫳一半遮

夢至青蘿山館

瑩確行來石徑微細尋舊路未全非依然窓戶遮三面記得
琅玕碧四圍粉壁淋漓留醉墨天風料峭上寒衣黃昏小院
偏閑寂澹月如絲照故帷

棗花簾外落桐花春晚光陰感物華絕代嬋娟隱空谷一門
詞賦盡名家

歷英女士工詩

樓臺楊柳青如畫庭院芭蕉綠上紗尚

記讀書臺畔坐金經一卷誦楞伽

春去

溫風闌雨信全非
怕見春從客裏歸
流水無情空采采
啼鶯有恨故飛飛
棠梨舊館誰爲主
花月新詞唱亦稀
便是重來時已換
玉樓人老綠陰肥

鹿城歸櫂口占

夾岸微風解纜時
平橋小雨落帆遲
馬鞍山色渾如舊
每到來游例有詩

自花朝後至錦溪春杪未歸寄醒逋三十韻

寂寞錦溪路
蕭條淞浦濱
遠山青靄靄
淺水碧粼粼
筆情無限捻書願
未眞交遊長契闊
世事劇艱辛
地僻賓朋少
邨深風俗醇
庭花看盡放檐雀
喜能馴檢點
詩篇富登臨
景物

新樓臺常倒影魚鳥自親人入饌思肥鯀穿波采嫩蔬宵闌
搜舊帙酒醒憶前塵覽往將三月相思又五旬飄零今已慣
書札寄來頻弱弟能勸讀山妻不厭貧簾櫳梳髻好楊柳學
眉顰同有羈棲意且看現在身文名窮亦損友誼久彌親徒
抱尊前感彌傷別後神屋邊叢樹暗江上暮雲屯我志甘沈
晦君才善屈伸歌詞焰曹植筆墨壓陳遵小飲攜鬱榼相逢
岸角巾丰標誠謗謗氣象亦闇闇夢裏空千里雨中過一春
短慙燈火闌深巷犬聲狺尙未能逃俗會將遂卜鄰偶耕何
足道偕隱豈無因却病教丸藥謀生愧負薪芳時憐骯體古
道歎沈淪池草碧於黛野蘚白似銀嗟予處幽僻往事爲君

陳

初夏齋居卽事

一春掩衡茅芳華倏已謝及此櫻荀時行廚會須借了却數
徒課偏得半日暇簾外竹蒼翠簷前花姹姪龕錢杖頭解濁
酒鄰家貲聊持此一杯以餞東皇駕嘆息節物移歲月許我
假芍藥紅上闌薔薇開滿架行樂當及時秉燭娛良夜感此
意踟躕獨坐短窓下

前夜雨瀟瀟春去苦不知芍藥開何晚石闌紅一枝雨中色
更媚折供古軍持曉起忽相見頓減昨日委因其已萎後想
其方開時榮悴固不久遲暮深足悲物當葆厥真以全賦界
資一爲耳目玩遂失所宜况乎春始來物物若有私轉眼
綠陰濃枝榦嗟離披人生亦若是感慨以係之秉質當自強
莫被東風吹

去年立夏早今歲作詩少爲惜時光過偏多塵事擾館中童

雨
兩三垂髫皆幼小吾媿爲人師誘以理易曉日月去堂堂江
波隔渺渺懸想我高堂夢魂時相繞傍彌雜花妍入簾殘月
皎醒來簷雀鳴茶爐烟嫋嫋

入夏方數日天氣已驟熱黃昏雨忽來瓦上聲淅淅輕雷若
有怒電光乍明滅夜深風更狂欲把庭花折芭蕉葉多捲箒
簪痕應沒曲港與溪通池蛙鳴不歇聽之不成寐益覺客懷
劣料知同夢人擁髻亦淒絕

夏夕不寐口占

永夕不成寐懷人最可憐簾鈎微有月清影到牀前

家大人客申江有感

接得申江一紙書故鄉米貴信難居但能飽喫殘年飯自可
安休半畝廬甕裏寒虀還四剖篋中故物任三肱
余家三馬偷兒所苦

硯田無恙書倉富跋脚科頭好自如

清閒我只羨農家秋至籬邊開豆花近世授經輕馬氏年來
問字少侯芭常懷短刺羞彈鋏擬買良田學種瓜便作郝夫
子亦好那堪帆影又天涯

渡鑾清河遇雨

逢秋歷夏此徘徊又遭扁舟載我回幕地日光遮不見漫天
雲氣鬱難開狂風忽起欲搖樹急雨未來先有雷且看跳珠
入船裏天公似把好詩催

暫向垂楊繫小艤黑雲堆墨壓篷窓水光激蕩將吞岸雨氣
迷漫欲滿江瞥見來帆如過鳥漸聞隔樹有鳴龍吳兒解水
偏多事水調新謳未貼腔

初秋

微風拂拂過池塘水蓼初紅菊未黃教婦種花翻舊帙呼僮
曬藥檢奚囊窓前隨意開三徑竹下偏宜置一牀茶蓋甚簡
渾細事已堪斷送半生忙

漸驚疏鬢添秋光一葉空庭竈井牀跋脚看書燈可近科頭
晞髮日猶長宵闌聲寂知蟲苦飯罷吟成思酒香差覺簟紋
渾似水天公一味作新涼

問夢衡病

無端薄病便添愁軀體情懷不自由簾外有聲頻側耳窓前
小坐自梳頭卽看鬢影蕭疎甚還耐秋風料峭不勸汝裝綿
須及早新寒昨夜製粧樓

已是愁中復病中起還無力臥偏慵怕臨鏡檻眉痕淡教下
簾鈎樹影濃薄被初熏時有夢長宵微倦忽聞鐘請看羅袖

寒如此懊惱年來帶更鬆

感遇

空谷有幽蘭其品軋芳杜非無高尚心徒與衆草伍孤蔓孕
寒香柔根託淺土從未知媚人亦非生當戶竟以見嫉鋤奇
冤抱千古見之三歎息瑤琴獨自撫

鸞鳳翔天末不與雞鷄爭梓柟生山中不共桃李榮操守良
獨異識見殊羣情豈其溺名利而與禍患櫻浮華固不久要
共歲寒盟惟以妬者衆謠諑始叢生材大乃被棄品高終見
輕旣不鳶世用當自葆厥貞

甚

除夕讌集天風草堂謹同滌盦師韻是日立春風雪寒

櫂牙冰乳滴殘年銀燭燒來照綺筵柏葉杯中春似海梅花

帳裏夢如煙更闌正是談心候歲暮猶虛繞膝前

時舉大人客海上

埋研藏彊情緒嬾聊將雞黍祀詩仙

之申江途中作

欸乃從茲去入烟渡口迷近村犬聲猛濶岸水痕齊舟小趁
潮上帆孤向日低一尊成薄醉有客歎羈棲

春日滬上感事

海上潮聲日夜流浮雲廢壘古今愁重洋門戶關全局萬頃
風濤接上游浩蕩東南開互市轉輸西北供徵求朝廷自
爲蒼生計竟出和戎第一籌

蒼茫水國帶春寒鯨鱣消餘宴海闊閭里共欣兵氣靜江山
始歎霸才難殷憂漆室何時已勦哭伊川此見端遠近帆檣
賈胡集一城斗大枕奔湍

烽火當年話劫灰，金銀氣溢便爲災。
中朝魏絳紓謨畫窮海，樓蘭積尸猜。
但出羈縻原下策，能肩憂患始眞才。
于今籌國詎容誤，爛額焦頭總可哀。

海疆患氣未全舒，此後豈能防守疏。
應有重臣膺督鑰，早來絕域會舟車。
土風誰補蠻夷志，波畢今登貨殖書。
千萬漏卮何日塞，空談國計急邊儲。

自申江返里門

一木碧無際，扣舷正苦吟。
帆多到家近，樹雜隱雲深。
遙岸見山色，夕陽驚客心。
昨宵歸夢裏，野寺斷橋尋。

懷吳江徐仲寶

簾幕愔愔地，燈光淡淡時。
故人成久別，百里亦相思。
多病惟緣酒，遺愁底是詩。
梨花寒不落，春雨夢徐熙。

塵迹原如夢歡悰不可期著書徒覆瓿閉戶且傾卮春草繞江路疏花出短籬宵深坐簾底寒上鬢邊絲

春日茗香宋維詩

紅護憲櫺綠護屏薄陰庭院落花飛長卿善病風懷減小杜工愁鬢髮稀銀燭燒殘聽夜雨金釵典盡到春衣酴醿淺白蘋蕪碧一擷春光總覺非

飄零身世感人天不識離憂不受憐泡影幻成名士夢鏡花參破美人禪酒懷跌宕思前事詩筆叢殘入舊年閑到鼠姑春已盡嫩寒尚殢被衣邊

筆床安置近書牀茶籠輕煙風自颺簾底有人閒擁髻畫長無事靜焚香花扶屐齒紅迷路雨濕苔衣綠上牆怕說神仙多小劫幾回蹀躞繞廻廊

縱有離魂何處尋銀燈淡淡夜沈沈抱來碧海青天恨同此
千秋萬古心生不竝時安間死昔猶難見況而今他年隔世
終虛願只恨情深緣未深

楊丈埜軒自蜀歸賦呈

萬行雲樹萬煙鬟鵠鳩聲中君正還五六年愁多似葉八千
里夢亂于山途窮悔作諸侯客境厄能凋壯士頗珍重尊前
始團聚夜深剪燭話迴環

詠繡毬花次許玉笥韻

素面嬋娟怯嫩寒聚花成雪護闌干未圓明月懸相照不散
春風併作團巧構樓臺瓊錦簇閒飛蹴踘玉塵乾天工別具
玲瓏手剪出紗羅一例看

落花次許玉笥韻

罷却千秋會。閒庭滿落花。深深荒徑濕。寂寂院門遮。低襯鞋尖鳳。飛粘鬢底鴉。前因渾似夢。和雨撲窓紗。

穀雨日於綠蘆師家看牡丹用羅昭諫韻

早起巡闌間。夙因東風一例作深春。廿番芳訊浮。沉夢四月輕寒料峭。人開到名花濃似海。曉來微雨細于塵絳。帷別有閒風趣。珍重尊前現在身。

深鎖

深鎖葳蕤隔幾重。淚痕已凝枕。香濃見偏掩。歛如神合日尚猜疑。况夜逢照檻。月留前度影。隔帷燈瘦舊時容。芙蓉顚顰。藤蕪死搖落。秋風奈箇儂。

鹿城應試夜泊城外

秋風秋雨過危橋。水上寒燈獨客燒。舊事渾如春去鴈。新愁

多似暮來潮舟人不語眠篷底殘月無聲墮柳梢自是名心
猶未淡明年相約看金焦

鹿城旅邸夜作

銀壺漏漸不聞聲四角秋紗八尺茵偏覺寂時蟲語苦偶然
涼處簾紋新還家夢短憐無迹滿地月明疑有人回首墜歡
渺難拾半爲烟影半爲塵

遊玉峰

約伴同櫚濟勝具寥衣共上玉峰山山中寺剝荒涼甚疥壁
新詩尙未刪

容易登山復下山迴頭拄笏看煙鬟山靈也解留人意一路
嵐光送我還

讀曲歌二首

願爲蝴蝶襦勿作鴛鴦帶襦貼郎身邊帶繫郎腰外
樹下見郎來拋个青梅子郎莫嫌梅酸妾心亦如此

濂龕師招賞牡丹先之以詩

剪風絲雨嫩晴天疏鬢輕颺藥竈烟猶戀殘春悲晚晚肯因
小病負嬋娟已知此日非前日漫說今年勝去年昨夜挑燈
眠不著自題幽怨寫紅箋

暫捲湘簾已惘然更楷啼眼對娟娟鼠姑半宿闌邊雨鳩婦
猶迷柳外煙濃酒比春容易醉好詩如夢不成篇朝來偏作
閑工課手校羣芳譜一篇

小窻鳥語惱人眠鎖日思君倍可憐如影如塵些子事不晴
不雨奈何天好花安用名香爇苦茗偏宜活火煎咫尺仙源
倘招隱未應索我買山錢

宴後呈滌盦師

天爲名花暫放晴潑酷時節過清明愁無今古消難盡酒爲
嬋娟醉有名藤竹焙茶宜我輩讀書識字見平生昨宵簾影
燈光裏不厭深杯一笑傾

翻因病齒強爲歡旣怕甜時又厭酸已分花前拚蕉萃不妨
窓底坐團欒沈沈庭院沈沈夜薄薄簾櫳薄薄寒料峭衣邊
風未止起携燈照小闌干

春草

簾幕無心春滿庭燒痕蘇後草青青客袍歲歲慙相似蠟屐
年年向此經和雨和煙南北路半花半柳短長亭勸君莫問
前朝事隋苑吳宮夢未醒

此生

六扇窗櫺一桁簾碧紗
窗外嫩寒添無憑無據
蛇醫褪疑喜
嗔燕語尖剛好別時
花淡淡最相憐處月纖纖
此生已了他生未懶
把香臺玉鏡占

紅夢

不知架果與蘭因
簟冷紅蕤鈎冷銀月缺
花殘惟有恨酒闌
燈焰更無人
明明記得終成幻
夜夜能來或是真
莫打黃鸝
莫嗔燕珊瑚枕上淚痕新